



24. oktober 2012

Inatsisartut suleriaasiat § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

- 1. Ukioq 2012-imut umiatsiaaqqanut tapiissutit aningaasaliissutit umiatsiaaqqanut qassinut naammappat?**
- 2. Ukioq manna tikillugu umiatsiaaqqat qassit aningaasaliiffigineqarpat?**
- 3. 2013-imut aningaasaliissutissatut siunnersuutit umiatsiaaqqanut qassinut naammassappat?**

(Inatsisartuni ilaasortaqaq Finn Karlsen, Siumut)

Tunngavilersuut:

Aningaasanut Inatsimmi kontomi pingaarnermi 51.07.40 aningaasartalik 5,948 mio. kr. ukioq mannarnut 2012-imut. Konto-p taasuma oqaasertaani atuarneqarsinnaavoq aningaasat agguaanneqartut aalisarnermik inuusutissarsiuteqartunut 35%-it umiatsiaaqqanut (piniarnermut aalisarnermut) 35%-it kiisalu nunalerinermik inuusutissarsiuteqartunut 30%-it. Taamaalilluni umiatsiaaqqanut 1.7 mio. kr. missaani atorneqartussaassapput kisiannili kontomi tassani oqaasertaani atuarlugit ima nangipput: ”konto pingaarnermi matumani aningaasaliissutit 2012-imi 3,5 mio. kr.-nik ikilineqarput, tamanna aalisarnerup, piniarnerup nunalerinerullu iluani aaqissuussaanerup ataatsimoortillugit naleqqussarnissaannik kissaateqarnerup kinguneraa. Aningaasaliissutit ikilinerat 2012-imi umiatsiaaqqanut tapiissutit illikartinneqartunit pingaarnertut atuutinneqassaaq”. Aamma taamatorpiaq ippoq aningaasanut inatsisissatut siunnersuummi 2013-imoortumi.

2013-imut kontomi 51.07.40 siunnersuutigineqarpoq aningaasaliissutigineqassasut 5,835 mio. kr.-nit, tassa aalisarnermut, umiatsiaaqqanut nunalerinermullu agguasineq allannguallalaarluni aalisarnermut 30%-nngorlutik umiatsiaaqqanut 35%-it nunalerinermullu 35%-inngorlutik agguataarneqarsimallutik. Kontomilu tassani oqaasertat ima nangipput: ”aningaasaliissutit konto pingaarnermi matumni pineqarput AI 2012-imut sanilliullugu 2013-imi 3,6 mio. kr.-inik appartinneqarput. Aningaasat Great Greenland A/S-imut immikkoortinneqartut kontomi pingaarnermi 10.13.11 aktiaateqarluni ingerlatseqatigiiffinnut aningaasanngorlugit aningaasartuutit-mut aningaasaliinermut atorneqassapput, taamaaliornermilu Great Greenland A/S 2013-imi ingerlaannarnissaa qulakkeerneqassaaq. Aningaasaliissutit ikilinerat 2013-imi umiatsiaaqqanut tapiissutit illikartinneqartunit pingaarnertut atuutinneqassaaq”.

Taamaammat apeqquteqarpunga aningaasaliissutit agguataarnerilu oqaasertaanilu ikilineqarsimanerat imminnut naapertuutinnngitsutut isigigakkit.